

Sing vooraf staande: Psalm 40:1 (p. 203)

- 1 Ek het die HEER lank in my druk verwag – / Hy het sy oor tot my geneig.
Toe ek bedruk was en bedreig, / Het Hy geluister na my jammerklag.
Hy wat aan my gedink het, / toe ek so diep gesink het / in modderige slyk,
Hy laat my rotsvas staan, / Hy laat my veilig gaan – / My voetstap sal nie wyk.

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Lofpsalm 96:1 (p. 480)

- 1 Sing vir die HEER 'n nuwe lied! / Die aard' se verste perke/ moet jubel oor sy werke,
en Hom die lof en hulde bied; / moet uitroep en verwag / sy heil van dag tot dag.

Geloofsbelydenis: Apostolicum

Na die wet sing ons Psalm 119:53 (p. 597).

Wet

Psalm 119:53 (p. 597)

- 53 Tot U roep ek; HEER, verhoor my, / en verlos my, maak my trou,
dat ek u getuienisse / heel my lewe lank kan hou.
Op u woord steun my verwagting: / smôrens by die eerste lig
is my oë en my hande / en my stem tot U gerig.

Gebed

- **Doksologie:**
 - **Aanbidding:**
 - **Skuldbelydenis:**
 - **Vergifnis:**
 - **Dank:**
 - **Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God:**
 - **Algemene bede:**
 - **Verligting van die Gees ter wille van die Woorddiens:**
- Amen.

Psalm 118:4 (p. 576)

- 4 Die HEER, die Hoof van duisendtalle, / sal in die stryd my hulp verskaf.
Dan kyk my oog met welgevalle / op my verwoede haters af.
Dis beter by ons bidde en wense / dat ons vertrou op God se mag,
as dat ons ooit vertrou op mense, / of selfs van prinse hulp verwag.

Skriflesing: Handeling 3

Teks: Handeling 3:6, 7

Maar Petrus sê: Silwer en goud het ek nie; maar wat ek het, dit gee ek vir jou: In die Naam van Jesus Christus, die Nasaréner, staan op en loop! Toe gryp hy hom aan sy regterhand en rig hom op, en onmiddellik het sy voete en enkels sterk geword. (Handeling 3:6, 7 AFR1953)

Kerngedagte: Verwag jou redding in Christus, want daar is geen ander naam onder die hemel waardeur ons gered moet word nie!

Inleiding: Telkens wanneer ons van die wondergenesings lees, dink ons onwillekeurig hoe jammer dit tog is dat die kerk die gawe van wondergenesing verloor het!

- Dis egter nie waarom dit in hierdie Skrifgedeelte gaan nie!
- Dit gaan hier om ons daaglikse verwagting.

Wat is ons verwagting? Verwag ons ons redding in fisiese aangeleenthede, soos onder andere geld, of verwag ons werklik ons redding in die Naam van Jesus Christus?

Fisiese verwagtinge hoef nie juis net geld te wees nie.

- Dit kan 'n ongesonde verwagting wees ten opsigte van enige fisiese ding. Dit kan iets wees soos my liggaamlike vermoëns, of die land se polisiemag, of beleggings/rentekoerse of wat ook al.
- Dit kan selfs 'n te groot vertroue in ons breinkrag of akademiese vermoëns wees.

Die feit is dat ons in elke saak ons redding van die Here Jesus Christus moet verwag. Dit is waaroor dit gaan.

Na aanleiding van hierdie wonderwerk, lewer Petrus 'n preek waarin hyself sy tema so aan ons verkondig:

Die saligheid is in niemand anders nie, want daar is ook geen ander Naam onder die hemel wat onder die mense gegee is, waardeur ons gered moet word nie!

(Handelinge 4:12 AFR1953)

In die Naam van Jesus Christus word ons herstel en genees.

- Die Here Jesus Christus genees nie net liggaamlik nie, maar ook geestelik.
- Daarom moet ons lewensverwagting deur ons aardse bestaan heen na God reik.

Redding van ons sondes en die verwerping van die ewige lewe, is alleen moontlik deur die geloof in die Here Jesus Christus. Hy sê self:

Glo in God, glo ook in My. (Johannes 14:1 AFR1953)

Uit ons teksvers kom die volgende twee sake na vore:

1. 'n Uitsiglose verwagting
2. Die onverwagte redding

1. 'n Uitsiglose verwagting

'n Kreupel man sit by die poort van die tempel en bedel.

- Hy is in alle opsigte 'n *misplaaste figuur*, want volgens die Wet van die Here mag daar geen bedelaar in Israel gewees het nie.
- Maar hierdie gebod het onder die hande van die Fariseërs deurgeloop.
 - Hulle het dit toe so vertolk dat dit 'n baie groot verdienste is om aan die armes aalmoese te gee.
 - Dit was natuurlik hoofsaaklik daarop gerig dat hulle hulle aansien by die volk sal verhoog as hulle dan groot aalmoese aan die bedelaars gee.

Uit 'n praktiese oogpunt gesien, sou hierdie bedelaar net so goed by die stadspoort kon gaan sit en bedel het.

- Dit doen hy nie, want hy het geweet dat hy by die tempel meer onder die aandag van die volk sal wees.
- Hy het geweet dat die voorskrif van die Fariseërs die mense dwing om hom raak te sien. Dit is die eerste rede waarom hierdie kreupel by die tempel sit en bedel.

By die tempel is die drukte aan mense net so groot as by die stadspoort.

- Almal wat kom bid, moet by hom verbygaan.

- Almal het hom dan ook geken, want hy het elke dag aalmoese van hulle gevra wanneer hulle gaan bid het.

So kom Petrus en Johannes dan ook tempel toe op die gebedsuur – dis omtrent drieuur ons tyd.

- Dis belangrik dat dit vermeld word, want dis 'n baie besige tyd by die tempel.
- Die hele volk het nou opgekom vir die middaggebed of die aandoffer.
- Daar was dus baie mense wat gesien het hoe God hierdie kreupele bo alle verwagting gesond gemaak het.

Die tweede rede waarom hy by die tempel kom sit en bedel het, was die *verkeerde beskouing* wat in hierdie tyd ten opsigte van die tempel geheers het.

- In hierdie tyd was die Jode onderwerp aan baie heidense invloede.
- Een daarvan was dat hulle die tempel beskou het as 'n plek waarheen jy kan vlug as daar *magte, ellendes of bose geeste* is wat jou bedreig.
 - Hulle het geglo dat die tempel die plek is waar jy enige magte wat jou teëstaan, kan oorkom.
 - Dit was vir hulle 'n soort van toevlugsoord wanneer hulle in die noute raak.

Om hierdie heidense standpunt te kan regverdig, het hulle Joël 2:32 gaan verdraai. Daar staan geskryf:

En elkeen wat die Naam van die Here aanroep, sal gered word; want op die berg Sion en in Jerusalem sal daar ontkoming wees soos die Here gesê het. (Joël 2:32 AFR1953)

Wat het hierdie man verwag as hy elke dag hier voor die tempel sit en bedel? Of anders gestel: Wat het hy gedink is die doel van sy lewe?

Hierdie man is nie heeltemal sonder verwagting nie.

- Sy grootste verwagting is dat hy genoeg aalmoese sal ontvang vir sy daaglikse behoeftes.
- Dit is ook al wat die Bybel van hom sê: Hulle het hom elke dag by die Skone Poort neergesit om aalmoese te vra.

Dit was egter nie 'n verwagting wat 'n blywende verlossing bied nie.

- Hy het geweet dat hy die volgende môre weer daar sal sit en bedel.
- Hy het geweet dat hy elke dag van sy lewe, tot sy dood toe, sal moet bedel vir sy geld.

Sy verwagting is uitsigloos.

- Lukas, die geneesheer, stel dit baie duidelik aan ons dat hierdie man *van sy geboorte af* kreupel was.
- Die woord wat Lukas vir sy siekte gebruik, beteken meestal *om verlam te wees*.
- Menslik gesproke is genesing vir gebrek onmoontlik – hy is nou al ouer as veertig.
- As daar enige genesing deur 'n geneesheer moontlik was, sou hy al genees wees. Die kreupele het waarskynlik self ook geglo dat sy gebrek ongeneeslik was.

Daar was vir hierdie man geen hoop op verlossing uit hierdie toestand nie.

- Hulle dra hom waar hy wil wees.
- Hy het geen verwagting nie, behalwe dat hy bekommerd is om lewensonderhoud in die hande te kry.

Al waaraan hy gedink het toe Petrus en Johannes voor hom gestaan het, was dat hulle hom 'n besondere groot aalmoes sou gee.

- *In hierdie opsig is die kreupele weer 'n misplaaste: Hy sit in die tempel, of eenvoudig gestel kan ons sê dat hy as 't ware by God sit, maar hy vra geld.*

2. Die onverwagte redding

Petrus het geen aalmoes gehad nie, maar die Gees het dit in hom gewerk om hierdie kreupel man te genees.

- Petrus en Johannes kon egter nie na willekeur gesond maak en wonders doen nie.
- Hulle was dienaars van God se wil – die Heilige Gees was hulle Leidsman wat hulle laat handel het soos God dit wou.

Petrus het die verlamde stip aangekyk en beveel om na hulle te kyk.

- Hy wou hierdie kreupel man opwek om die genade van God te ontvang terwyl hy maar net 'n aalmoes verwag het.
- Op die manier wat Petrus vir hom gesê het: “Kyk na ons”, is dit duidelik dat die kreupele iets besonders kon verwag.
- Met hierdie woorde eis Petrus sy aandag vir dit wat God met hom gaan doen.

Die Here Jesus is deur die Jode gekruisig. Vir hulle was Hy dood.

- Maar hier is Hy lewend aan die werk!
- In die krag en in die Naam van Hom wat hulle gekruisig het, word 'n kreupel man genees en bekeer.
- So groei die kerk van Christus steeds.

Voordat Petrus die bedelaar die ware redding in Christus kan bied, moet hy hierdie man se lewensverwagting verruim.

- Hy moet hom eers reghelp en daarop wys dat hy van die *verkeerde kant af* sy redding verwag.
- Om dit te doen, sluit Petrus aan by die kreupele se verwagting.
 - Hy sê: “Silwer en goud het ek nie...”
 - Anders gestel: Hy sê dat hy geen footjie het wat hy hom kan gee nie.

Ons kan ons voorstel dat hierdie bedelaar dadelik geskok was in sy verwagtinge.

- Oombliklik was enige vorm van hulp van die kant van die apostels vir die bedelaar uitgesluit.
- Petrus erken aan hom dat hy nie aan sy verwagting kan voldoen nie – hy het nie die geld wat hy van hom vra nie.

Maar Petrus wil hom graag help in sy nood en gebrek.

- Wat hy het, is hy bereid om te gee.
- Hy het 'n geloof in die Here Jesus Christus wat so sterk is dat hy glo aan genesing – selfs die oombliklike genesing van hierdie man.
- Wat hy gee, is die *werk* en die *gawe* van die Here Jesus Christus.
- Petrus wil dus aan hierdie verlamde iets van die hemelse glorie gee.

So word die verlies aan 'n aalmoes vir die lamme 'n wins in Christus. Soos 'n basuinstoot van oorwinning klink die stem van die apostel:

In die Naam van Jesus Christus, die Nasaréner, loop. (Handelinge 3:6 AFR1953)

Hiermee stel Petrus dit duidelik dat hy die dienaar van Jesus Christus is.

- Die Here Jesus is die Werkmeester van die wonder.
- Hiermee stel hy dit ook baie duidelik aan die kreupele dat dit is waar sy redding lê.
- Sy redding lê in die Here Jesus Christus en nie in materiële behoeftes nie.

Hy preek deur die genesing dat redding net op een manier moontlik is.

- Verlossing/redding is alleen te kry in die Naam van Jesus Christus die Nasaréner – dit is die volle titel van die Verlosser!
- Die volle naam van die Here Jesus Christus is nie 'n towerspreuk soos wat die Jode gedink het dat JHWH is nie.

Dit is *trionfantlike ironie* as Petrus praat van die *Nasaréner*.

- Met *Nasaréner* wil hy dit duidelik stel dat hierdie veragtelike en onaansienlike Jesus onder die Jode wat hulle dan ook gekruisig het, nogtans die beloofde Saligmaker is.
- Hierdie skeldnaam versinnebeeld die gehoorsaamheid en priesterlike vernedering waardeur Jesus sy volk verlos het.

Aan hierdie Jesus het God alle mag in die hemel en op die aarde gegee.

- Daarom kan Hy hierdie kreupele met 'n wonder genees: liggaamlik en geestelik, want ons lees nou vir die eerste keer dat hierdie man God geprys het.
- Deur die wonder openbaar die apostel die krag wat van die Here Jesus af kom. **In die Naam van Jesus Christus is dus *op koninklike bevel: in die genade van Jesus en deur die goddelike krag van Christus*.**

Die Naam van die Here Jesus is sy openbaring. Dis 'n konkrete geestelike krag – die persoonlike openbaring en aanwesigheid van God self.

- Die aalmoes wat die kreupele ontvang, is genesing;
- Maar nie genesing sonder meer nie: Die eis is gehoorsaamheid en geloof in die Naam van die Here Jesus Christus.

3. Toepassing

Die verwagting van die mens het altyddeur by die Here Christus verbygegaan!

- Met sy koms verwag Israel 'n leeu – en dan kom daar 'n Lam!
- Ons leef soms in soortgelyke misplaaste verwagtings.

Ons enigste verwagting moet die ewige redding in die Here Jesus Christus wees.

- Alle ander dinge wat daarby hoort, word deur God geskenk.
- Hierdie kreupele sit by die tempel – maar aanvanklik mis hy die God van die tempel!
- Hy sit as 't ware aan die voete van die Here, maar sy oë is op die mense gerig wat verbykom, met die verwagting vlak in sy oë dat hulle hom tog 'n aalmoes moet gee.
- Net soos hierdie kreupele verwag ons soms ons heil uit 'n heeltemal verkeerde oord, al dink ons dat dit die beste vir ons is.

Dit is nie verkeerd om materiële verwagtings te hê nie. Maar dan moet ons dit verwag onder die genade van God en ook nie so dat ons verwagting ten koste van Christus is nie.

Ons verwagting moet alleen in die Here Jesus Christus wees.

- Hy het ons met sy soendood reeds van ons geestelike kreupelheid genees.
- Ons Nagmaalsformulier wys ons ook daarop dat Christus deur sy dood die oorsaak van ons ewige honger en kommer weggeneem het, naamlik die sonde.
- Hy het vir ons die lewendmakende Gees verwerf.

Laat ons dan as geneesdes Christus verwag totdat Hy weer kom om ons by Hom te vergader.

Ons grootste verwagting moet bo hierdie lewe uitstyg.

- Ons grootste verwagting is die vergewing van ons sondes.
- Dit is alleen moontlik in die Naam van Jesus Christus, want dit is die enigste Naam wat aan die mens gegee is, waardeur hy gered moet word.

Amen.

Slotgebed

Slotpsalm 4:2 (p. 15)

- 2 Weet dat die HEER vir Hom tevore / 'n gunst'ling afgesonder het,
en dat hy, deur God self verkore, / nooit op sy swerftog is verlore,
maar dat die HEER hom hoor en red. / Beef dan, o dienaars van die sonde,
oortree nie teen sy heil'ge wil. / Deursoek jul hart in stille stonde,
as eensaamheid omsweef jul sponde, / verwag die HEER en wees net stil.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Gereformeerde Kerk Bellville
Datum: 6 Februarie 2011